

August  
2019



Vol. X No. 5

# KRISTIAN THALAI

Kristian Thalal Pawl Chanchinbu thla tin chhuak



HRINGLANG TLANG pg.29    KANTU pg.27    EDITORIAL pg.2  
WORK CAMP pg.9    HRUAITUTE CHANCHIN pg.17    KEIMAHNI pg.31



Semi Final 22<sup>nd</sup> August / Final 29<sup>th</sup> August  
@ Dawrpui Kohhran Centenary Hall  
.....Live Telecast@Hruaina Eng Channel.....

## TU PAWL NGE I NIH?

*Chris M.S. Dawngkima*

**KTP LEH CAREER AWARENESS**

*Rev. Zonunmawia*

**KRISTIAN THALAI PAWL LEH KEI**

*Upa Haukhama*

**NUN KTP**

*Upa Lalmuana*

**MARK WAHLBERG - AN CHANCHIN**

**NUN KAWNGAH MIN HRUAI RAWH**

*Upa Dr. L.N. Tluanga*

**BIBLE STUDY**

*Pastor C. Vanlalmalsawma*



Khawzawl Venglai Branch : Golden Jubilee



Lallen Pastor Bial : Leadership training



Mualkawi Branch - Diamond Jubilee



Kawrethawveng Pastor Bial - YRC Campaign

## Kristian Ṭhalai Pawl chanchinbu thla tin chhuak

1970-a chhuah ṭan - Kum 49-na vawi 8-na Chhuah tawh zat : 487

**Editor :**

Robert Lalduhzuala

**Joint Editors :**

C. Malsawmtluanga  
Lalsiammawia Pachuau  
Malsawmtluanga  
K.Lalchhanhima

**Manager:**

Lalrinchhana Ralte

**A lak man :**

Kum khatah - ₹ 80.00  
Copy khat - ₹ 7.00

*Thu chhuah tūr nei chuan Editor,  
Kristian Ṭhalai, Synod Office-ah thawon  
tūr a ni a; a la duh chuan KṬP Office-ah a  
man pēk lâwk a ngai.*

**Office Phone : 8794796008**

**E-Mail :**

[kristianthalai1970@gmail.com](mailto:kristianthalai1970@gmail.com)  
[centralktp@gmail.com](mailto:centralktp@gmail.com)

### KRISTIAN ṬHALAI PAWL

**Thupui**

Rawngbawl tūra chhandam

**Thupui inngahna**

Ephesi 2:10 Thil ṭha ti atán  
Krista Isuaah chuan siama awmin,  
ama kutchhuak kan ni si a, chu thil  
ṭha tih chu kan awmna tūrín  
Pathianin a buatsaih lâwk a ni.

**Thiltumte**

1. Isua Krista rinna leh amah anna kawnga ṭhalaithe hruai.
2. Kohhran kut ke ni tura ṭhalaithe buatsaih.
3. Kohhran hnathawh tihpuitlin.
4. Krista Chanchin Ṭha puan darh.

## A CHHUNGA THU AWM TE

|   |    |
|---|----|
| 1. Editorial  | 2  |
| 2. Sermon - <i>Tu pawl nge i nih?</i>                   | 3  |
| 3. Article - <i>Nun kawngah min hruai rawh</i>          | 6  |
| 4. Work Camp - <i>Tuithumhnarah</i>                     | 9  |
| 5. Bible Study- <i>Bungbel Thianghlim</i>               | 11 |
| 6. An Chanchin - <i>Mark Wahlberg</i>                   | 14 |
| 7. Hruaitute Chanchin- <i>Lalrinchhana Ralte</i>        | 17 |
| 8 Article - <i>Nun KṬP</i>                              | 18 |
| 9. Ṭhlaite Suangtuahna- <i>KṬP leh Career Awareness</i> | 20 |
| 10. Article - <i>Kristian Ṭhlai Pawl leh Kei</i>        | 23 |
| 11. Kantu - <i>Jubili Branch</i>                        | 27 |
| 12. Hringlangtlang                                      | 29 |
| 13. Keimahni  | 31 |



## TIHHLAWHTLIN

**K**RISTIAN THALAI PAWL chuan hun pawimawh leh hlu tak Jubilee kan hmachhawmin, kan hmanng chho fan mek a ni a, he Kristian Thalai Chanchinbu Golden Jubilee lo thleng tur hian KTP member tinte hnenah kan mamawh ang theuh zelin zalenna leh malsawmna rawn thlen sela a va duhawm em!

He Golden Jubilee puala ram pum huapa KTP-te intihsiakna, Kristian Thalai Golden Jubilee Inter-Branch KTP Quiz Competition 2019, Central KTP-in a buatsaiha branch thahnem tak an han tel thei hi a lawmawm takzet a ni. He Golden Jubilee lawmna programme hmasa ber tihlawhtlingtu Branch leh Branch aiawh member-te hi fak an phu a, kan faka.

Rawngbawlina peng hrang hrangte hi kan hman vang leh kan chak vang chauhva thawk tur leh tihlawhtling tur ni ta ila chuan kan hruaitute leh kan rawngbawltu tangkai tak takte hian an tihlawhchham ve fo ngei ang le. Amaherawhchu, a hnung kan zui Lal Isua khan kraws kha a peih chinah ni lovin, Pa thu awihin keini mi sualte min chhandamna turin Kalvari tlang thleng a pu a; chu mai ni lovin krawsah ngei chuan kan tan a thi ta a nih kha. Kha thihna hlu tak kha Lal Isua hian a chak zek zek bik hauh lo va, a phur bik lo. A Pa duh zawng tih chu a chaw tui ber a nih angin, thi khawp hiala thu zawmin chu Pa thu chu a lo tihlawhtling ta a nih kha.

KTP rawngbawlina hrang hrangte hi han thlir thin ila, ram pum huapa rawngbawlina te, bial leh branch-a kan rawngbawlinaah te pawh hian kan chak vak loh leh kan phur chiah lohna thil tam tak, inkhawmpui leh committee-te pawhin a rel chang a awm thin ang. Chung hunah chuan a tihlawhtlingtu kan nih mai hi Isua hnung kan zuina chu a lo ni reng mai a ni.



*“Nimahsela, keini zawng boral tùra hnungtawlh páwla mi kan ni lo va; nunna humhim tùra rinna nei páwla mi kan ni zâwk.”*  
(Heb. 10:39)

**T**unlai khawvêlah hi chuan mahni tâwkah buai kan intiin, hana pawh kan thawk tak tak ãan tawh a; thil zawng zawngah themtleng tẽ zâwk ang maiin kan inrawlh vek hlei thei tawh lo. Chuvàngin, thil ãangkai leh ãangkai lo deulte thliara, ngaih pawimawh lehzual tùr thil mahni kan inbituk a lo ngai ta a. Miin, “Ka hman lo,” a tih miau chuan kan inzahsak lo thei ãhin lo. Chutih mêk lai chuan Pathian rawngbàwlna lama kan rilru put dân tùr pawh ngaihtuah chian a ãul ta hle. Tu emaw chuan inkhâwm hman loh chhuanlam ãha tak tak a siam thei a; mahse, inkhâwm ngai pawimawh mi erawh chuan inkhâwm ãhulh chhan tùr khawp chhuanlam a hmu zo lo. Kan chhia leh ãha hriatna ráwna thil ãha kan tih hian hriat loh hlànin tu páwl nge kan nih kan lo lantír reng a lo ni!

**Engtin nge kan páwl chu kan tàr lan ang?**

**Kan talent-te tipungin**  
Talent khat dawngtu laka a pu beiseina kha a sang hauh lo, phùm bo mai mai atán erawh a phal lo thung! Talent khat leka tipungin a pu kha lo hmuak ni sela, “Tlém te chungah i rinawm a, tam tak chungah ka awmtír ang che,” tiin talent sàwm

dawngtu nèn malsàwmna huang khatah an awm ngei ang! Mahse, ani zawngin nang leh kei ang bawkin a neih chhun chu a en a, a sit tlat a; a aia buaipui tùr ãha zâwk hriaah a inngai tlat!

Kan ãhenawmte hausak-naah mahni inhmuh ve kan tum a, ka ãhiannu neih ang neih tumin ka intihah a, ka ãhianpa talent ang chu sual

chhuah ve ka inbeisei tlat!  
Mahni lam inena, keimahni a  
theihna awm chu zawng  
chhuak hmasa lova mi dang  
ka en chhúng chuan, nun  
hlawhtling nei tùrin bul ka la  
ṭan lo tihna a ni zâwk. Chu  
vàng chuan kan neih chhun  
hi sit biklovin, a petu beiseina  
ang taka chêt chhuah ve a  
hun. Kan dawn apiang  
lungawi taka kan peipun hian  
tu páwl nge kan nih a lo lang  
mai ṭhin!

Mi pakhat hian  
vawkpui no nei mai tùr chu  
buaipuiin hmanhmawh takin  
vawk in a sa ṭha thuai thuai  
a. A fapa, lo thlír rengtu  
chuan, “Ka pa, engati nge  
thing tuai ṭha bikte thlang  
lova i hmuh remchàn apiang  
vawk in sak nán i hman mai?”  
a lo ti a! A pa chuan, “Vawkin  
no a nei dawn tawh si a, hmun  
hla tak aṭanga thingtuai ṭhate  
fawm khâwm ai chuan, ṭha lo  
deuh zâwk pawh ni se a  
hnaia mi chu hnathawh  
nghâlna tùrin a ṭangkai zâwk  
a ni,” tiin a hrilhfiah a.  
Chutiang bawk chuan, talent  
ṭha tak tak hman phâka awm  
si lote ai chuan Pathian  
hnaiha awm, hman tùra inpe  
nghâl maite hi Pathian tán an  
hlu zâwk fo ṭhin a ni.

### Mi dangte nèna kan inremin

Pathian chu hmangaih-  
na a nih avàngin mi dangte  
nèn inremin kan awm tùr a  
ni. Huat ngah lutuk  
tán rawng a bawl theih loh.  
Tu mah réng kan inngaihsàn  
tawn lohna páwl chu a chak  
thei ngai lo. Rom 12:18-ah  
chuan, “A theih phawt chuan  
nangmahni lam tal mi zawng  
zawng nèn inremin awm  
rawh u,” min ti a. “An duh  
emaw duh lo emaw, nang-  
mahni lam tal chuan eng tik  
lai pawhin remna duh rawh  
u,” tihna a nih hmél. Pathian  
thu vèk chuan, “Chutichuan,  
an lu chungah meiling i chhèk  
khâwl a ni ang,” a ti a. Hei hi  
remna duh lote chungah  
chhiatna lo thleng tùr sawi  
nán kan hmang ṭhin a; mahse,  
“*I ṭhatna mei chuan mi dangte  
pawh a la kàng fai ang,*” emaw,  
“*I ṭhatna hmangin i la hneh  
ang,*” tia sawi fiahna emaw hi  
a pawmawm hle.

Kan kuta awm hauh lo  
thilte buaipuia kan phíli  
chhúng hian, kan hun hlu leh  
nun nuam zâwk chu theih-  
nghilhin kan khawhral fo.  
Thâwm ṭha lo laka beng hup  
mai hi a finthlak zâwk cháng  
a awm ang bawkin, mit it

zâwng leh tikham thei thil laka maimitchhìn mai hi hnehna a nih cháng a awm ve bawk.

Tûk khat chu Whatsapp group pakhatah hian thu ngaihnaawm tak mai ka chhiar a. Chhiar a manhlain mi dangte pawh a hneh a ni ang, an chhàwn ÷ha hle rêng a. Pakhat erawh chuan a thuken leh sawi tumte hmuh kânin, *"Han chhiar nawn teh u, 'Hle mai' tih a tam hle mai,"* tiin a rawn nuihsawh a. A ÷ha lai sawmkua pakua chu hmuh kânin, a thu ziaka fuh lo lai pakhat chu ani tán chuan a langsar zâwk a nih chu! Tehna hruì nèn fir taka kan kianga mite kan teh reng chuan mi dangte nèn kan inrem thei lo vang a, tupáwl nge kan nih an hre fiah thei lo vang.

### Pathian tána inséngsovin

Putar bengngawng pakhat hian inkhâwm a thlah thei rêng rêng lo mai a. A tu leh fate chuan, "Ka pu, eng mah i hre thei azeng pawh a ni si lo va, inah hian awm ve mai mai tawh la. Inkhâwm chu i tán eng nge a sâwtna?" tiin an zâwt a. Ani chuan zângkhai tak maiin, "Tu pawl nge ka nih ka lantír alawm," a ti sam ãt mai! He putar hi

chuan a hlâwkna tùr lam a ngaihtuah lo va, inséngsova Lalpa dàwr chuan a tilungáwi tâwk êm êm a ni!

Jebus mi Arauna khân Lal Davida thil hlan tùr zawng zawng kha lo tumsak huam mah se Davida chuan, "A man neiin a lei ngeiin ka lei sak zâwk ang che; eng mah inséngso lovin Lalpa ka Pathian hnênah halral thilhlante ka hlân tawp lo vang," a ti (2 Sam. 24:24). Zarephath hmeithai khân a ei tùr neih chhun kha Pathian mi Elija tán a pe a, inséngso ngeiin Pathian chibai a bûk ve bawk (1 Lal. 17:8-16). Lal Davida nun hausakna chuan vawiin thleng hian min la hneh a, Pathian meuh pawhin, "Ka thinlung ang pu mi," tiin a chhuang hle (Tirh. 13:22).

Hmeithai rethei pawh kha a inpêkna thûk tak avàng khán, mi hausa chhiar sèn lohte khûmin vawiin thlengin a chanchin kan la zir bawk! Thil ÷ha ti atán Krista Isuaah siamin kan awm tawh. Awm mai mai tùra koh kan ni lo va, hah ve tùra koh kan ni. Chàn nei ve tùrin Isuan min ko.

**Tu páwl nge i nih ve le?**

[www.mizoramynod.org](http://www.mizoramynod.org)



*Aw Thlarau Thianghlim, lo kal la,  
Kan tha tichak ang che;*

-----  
*Kei pawh ka banah min kai la,  
Nun kawngah min hruai rawh.  
(KHB 308: ch. 1 & 4)*

Kan KṚP ve lai kha a rei ta deuh va, kum 1960 leh a hma lam a ni tawh a; Mission Veng Kohhranah leh Bialah leh Central lamah pawh nihna chu ka chelh ve hman nual a. Kan hun lai kha chuan ṭawngṭai ho leh zaipawl lamah kan inhmang nasa ber a ni. KṚP thupui – *Rawngbawl Tura Chhandam* – tih hi kan luhchilh nasa a. “Rawngbawl turin Lal Isuan min chhandam a, mi dangte chhandam an nih ve theih nana rawng bawl kan ni” tih hi kan thu rolum ber a ni ṭhin. Kum 1961 aṭangin phai lamah – Barapani, Shillong leh Gauhati-ah kan tei chhuak ta a; kum 1973-a Mizorama kan lo kir leh chuan ‘ka over kum’ a lo ni der tawh a. KṚP-ah hian ka thawh hlawk lo hle tih ka han inpuang a nih chu.


Kristian ṭhalaite tan – a nihna takah pheih chuan, Kristian zawng zawng tana pawimawh em em chu, kan thupui *Nun kawngah min hruai rawh* tih khi a ni. Heta tan hian ‘kawng thum’ chauh tar lan i han tum dawn teh ang.

**Ni tina Pathian pawl  
(Quiet time)**

Hei hi a pawimawh tawpkhawk a ni – ni tina hun bik insiama Bible chhiara Lalpa pawlna hun hman ziah hi. Lal Isua tih dan pawh a ni. “*Tin, zingah khawwar hma daihin a tho va, a chhuak a, thlaler hmunah a va kal a, chutah chuan a ṭawngṭai a*” (Marka 1:35). He lai thu hi Lal Isua chanchin sawina a ni. Hei hi kan entawn tur



pawimawh tak niin ka hria. 'Zing khawvar hma daiha thawh' chu tam tak tan a remchang lo mai thei – eng pawh ni se, 'zing thawh tlai lutuk hi chu a Kristian lo a ni' kan tingam awm e. Keini tana ka han sawi uar duh lai ber chu, he Bible changa Lal Isua tih dan kan hmuh hi a *principle* talin i zawm ve hram hram ang u, tih a ni. Entawn tlak ber ka ni lo vang tih ka hria a: tuk tin ka thawh hlima ka tih hmasak ber chu Bible ch h h i a r a *ṭawngṭai* ziah a ni. Chumi hma chuan *mobile phone* ka en ngai lo va, tu mah ka be ngai bawk lo. Hei hi ka



dam phawt chuan ka tih dan kumkhua a ni. KṬP member-te hian in tih dan a ni ve em le? Tuk tina Bible chhiara, ngaihtuaha Lalpa pawla *ṭawngṭai* ṭhin hi tihmak-mawhah lo neih teh u. Ṭhenkhat tan zing lam kher a rem lo a nih pawhin, ni khat/ 24 hrs chhungin wavi khat tal

chutiang *quiet time* chu hmanng ngei ngei turin KṬP member zawng zawng ka fuiah duh che u a ni. In tih ṭhin chuan in in chhir miah lo vang.

**Ṭawngṭaisakna  
(Intercessory prayer)**

1 Timothea 2:1-3-ah, "Chutichuan...thil dil *ṭawngṭai* na te...*ṭawngṭaisakna* te... Pathian ngaihin...a lawm tlak

a ni," tih kan chhiara. Eph. 5:18-ah, "...mi thiang hlim zawng zawng tan ṭhahnem-ngai tak leh dil tlatin ngaihven rawh u," tih a awm bawka. Mahni tan leh chungkua leh lainate tana *ṭawngṭai* tur hi chuan fuiah vak kan ngai lo a ni

mai thei. Heng hi kan tih tur a ni a, a pawimawh a, kan thlahthlam loh tur a ni. Heta ka han sawi uar duh chu *ṭawngṭaisakna* hi a ni a. Hei hi a pawimawh khawp mai a, rawngbawl na peng hlu tak leh thiltithe i tak a ni. Setana leh a hote pawh hian *intercessory prayer/ṭawngṭaisakna*

hi ringtute hmanruaa do let ngaihna an hriat loh leh a suak an siam theih miah loh awm chhun a ni, an ti. Hei hi KTP membarte hian *rawngbawlna peng pawimawh tak* anga ngaia, mahni mi mal leh a huho pawhin uar turin ka fuih duh che u. Kar khat daih emaw, thla khat daih emawin *ṭawngṭaisak tur thupui* siamin, ti thar zelin, ngaih pawimawhah nei ta ula, a va ṭangkai dawn em! Rilru ngaihtuahna leh hun leh tha sen deuh pawh a ngai ngei ang. Hei hi ngaih pawimawh ni thei se, a ṭangkaiin a sawt em em ang.

### **Nun kawng rel fel (Guiding principles/Order of priority)**

Thupui hi a Sap ṭawng hian ka han dah tel zel a, KTP membar tam tak tan a chian zawk ka beisei vang a ni. He kawng thumna chungchanga ka sawi duh chu – kan Kristian nun kawngah hian thil pawimawh indawt dan leh thutlukna dik siam tura rilru tehfung fel tak, a theih chin china neih sa thlap a pawimawh tih thu hi a ni. Tlang chung a thusawi, Matthaia bung 6-ah Lal Isuan thil inpawimawh hleih dan a

sawi chu: “Ei tur aiin nunna a thupui zawk lo vem ni? Silhfen aiin taksa pawh a thupui zawk lo vem ni?” (ch. 25) tih a ni. Hetiang deuh hian thutlukna/decision siam a ṭul hun apiangah KTP membarte hian thil inpawimawh hleih dan rilruah thliar fel sa in neih theih chuan buai chhe lovin thutlukna in siam zung zung thei dawn a ni. In rilruin emaw, ziaka mahnia a ruk deuh pawha kawlin emaw thil pawimawh dan indawt *order of priority* fel tak, ngun taka inngaihtuaha Pathian rawn zel chung a siam fel sa nei ta ula, a ṭhain a ṭangkai thei khawp ang ka han ti a nih chu. Lal Isuan ngaih pawimawh tur min hrilh chu, “*A ram leh a felna chu zawng hmasa zawk rawh u*” (Mt. 6:33) – hei hi pawimawh ber, pakhatnaa dah tlat tur a nih chu. Chutiang zelin, ngaih pawimawh indawt mumal tak, felfai tak kan neih a ngai a ni tih i hre reng ang u.

**Lalpa Thlarau chuan  
Nun Kawngah hruai zel  
che u rawh se.**



## Tuithumhnarah

*K. Labremsiama*

**N**aupang thutna tur *lane* nei hranga, kohhran inkhawm hrang hranga naupang inkhawm thup thei leh Kristian Hla Bu hla har deuh pawh thiam nal em em thei naupang nei kohhran hi Mizoramah an awm ang tih rin phak a ni lo. Lawngtlai *district*-a khaw pakhat, *Presbyterian* Kohhran in 25 bawr leh kohhran mi pawh 125 lek awmna erawh chuan heng naupang kan sawi ang hi zu nei tlat a maw le! He khua TUIITHUMHNAR Kohhran hi an va fakawm em! Khawpui zawkah inkhawm tan hunah zai tham an awm loh laiin, anni kohhran erawh chu dar hmasa rik rualin an kim thei zel nia maw le!

Tuithumhnar khua hi Lawngtlai atanga dar 6 vel kal a ni a, a khaw mipui hi Bawm leh Lai hnam deuh vek an ni. kum 2007-a din a ni a, Pastor thuthmun a ni a, Pro. Pastor nei bawkin thawktu 4 an awm mek baw. An bialah hian Ngengpuitlang Kohhran, Tuidangchhuah Kohhran leh Lunghauka Kohhrante an awm a. Bial chungah hian kan kohhran in 124 a awm mek a, kohhran mi 650 leh danzawhkim 363 an awm mek baw. Ngengpuitlang atang hian fur laiin motor a luh theih loh avangin he khua kal tur chu in-fit a ngai hle.

Champhai Vengthlang Branch KṚP chuan 2018 Project-ah ramthar tlawh kan nei a; tichuan, KṚP member 24 leh Upa Vanlalhruaia Sailo, Kohhran aiawhte chuan Nov. 11, 2018 zing dar 6-ah Tuithumhnar tlawh turin Champhai kan chhuahsan a, Lawngtlai Bazar Veng Kohhran Hall-ah riakin, ni 8.11.2018 chawhnu dar 3-ah Ngengpuitlang kan thleng a. Ngengpuitlangah hian kan thawktute'n min lo dawng-sawng a ni. Bus a kal theih tawh loh avangin kein Tuithumhnar, km. 13 zeta thui panin kan kal leh ta a ni. Kea

kal ngai lo tan chuan thui ve tak a ni. Mahse, kan phur zawk em maw tih mai tura kan kal liam dam dam te kha a va hmuhdawm em! Khaw en laia thlen hman a nih loh avangin zan thim hnuaiah kal a t̄ul a; mahse, hlim taka kal zelin kan tum ram chu zan dar 7:30 velah kan thleng ta a ni.

Tuithumhnarah hian thawktu mi 4-te inah kan riak a. Kan thawktute felzia hi Champhai thlen hnu pawha kan sawi zui ber a ni. An inpekna hi a ropui hle mai. Kohhran Committee-in zanriah min lo siamsak a, kan va lawm lehzem! Kan chau tlang deuh bawka ni ang, zan kan mu chu thawm a t̄ha kher mai!

Work Camp-a kal ni lo mah ila, kan hun a thawl em avangin a tukah Kohhran Sunday School panna step kan siam a, hmeichhe t̄henkhatin thawmhaw bal an su bawka, chauh thu sawi an awm lo. PHE tui a awm loh vangin tui chawi chawp a ngai a; mahse, kan thawktu chungkuate'n an tui dahna zawng zawng khatin an lo chawi sa diam a, nuamsa takin

kan awm phah a ni. Inrinni zan at̄angin kan inkhawm tan a, Pathianni nilengin kan inkhawm bawka. Inkhawm boruak a nuam hle mai a, kan hlawkpui hle a ni.

Kan haw hun a lo thleng ta der mai. Ni 12.11.2018 zing dar 5-ah kein kan bus dahna Ngengpuitlang kan pan leh sap sap a, Ngengpuitlanga kan thawktute'n tuk̄thuan min lo siamsak a, puar taka kan ei hnuin bus-in haw kawng kan zawh chhonzawm leh ta a ni. Lunglei Chanmari KTP member-te'n zan rei tak thlengin min lo hmuak a, Kohhran Hall-ah riahna tur min lo buatsaihsak vek mai a, an va fakawm tehreng em! Tichuan, ni 13.11.2018 zingah Lunglei at̄angin Champhai panin kan chhuak leh a, tuang takin zanlai dar 12-ah Champhai Vengthlang kan thleng ta a ni. Kan member-puite'n biak inah min lo hmuak a, Pathian hnena lawm thu sawina kan hman hnuin kan t̄in darh ta a ni.

Kan ram chung ngeiah tlawh tur leh work camp neihna tur hi kan va la ngah em! State pawn lam ringawt hi Ramthar Field em maw kan ti ang tih a hlauhawm hle mai.



## BUNGBEL THIANGHLIM

*Pastor E. Vanlalmalsawma  
Sihfa Bial*

Mimahsela, in ropuia hian bungbel, rangkachak leh tangkaruaa siam chauh a awm lo va, thing leh belleia siamte pawh a awm thin a; thenkhat ngaihhlut tur a awm a, thenkhat chu ngaihhlut loh tur a awm bawk. Chuvangin, chung thil laka mi a inthiarfihlim chuan bungbel thianghlim, Lalpa hman tlak, hnathawh tha tinrenga inpeih sa, ngaihhlut tur mi a ni ang (2 Timothea 2:20-21).

Ram bel hi tinreng chhuanna atana hman a ni thin. Tangkai viau mah se, a zahawm lo thung tlat si! Tirkkoh Paula chuan, “Kristian nun chu tinreng daih nun ni mah se, Lalpa tana serh hran, nun tlang, thianghlim, danglam leh tha bik a ni tur a ni,” a ti.

Tirkkoh Paula hian Rom tan in atangin Timothea hi lehkha a thawn a, chu chu a thih dawn hnaih lam, AD 66 bawr vel nia rin a ni a. Timothea chu huaisen takin, fuih leh nawr a fawm a. A rawngbawlnaah mi dang nen an la inchaltauh fo vang a. Sual thukna hnuaiah, Krista pasaltha a nih angin dawhthei

taka tuar zel tur leh fing taka zirtirna dik lo leh a theh darhtute pawh hmachhawn thiam turin a fuih a ni.

Bible kan en chuan bungbel {(Vessels) Gr. Skeuos} hian hmun a chang hnem em em a, Bible ram atanga thil hlui laih chhuah zingah pawh bungbel laih chhuah hi a tam deuh ber a ni awm e. A tlangpui thuin bungbelte hi thil chi hrang hrang – hlum, thir, savun, thing, puan, etc.- a siam a ni hlawm a. Hun a kal hret hnu phei chuan lunga siam te, dara siam te, tangkarua leh rangkachaka siam te, darthlalanga siam te leh a dangte an hmang ta zel a. Alabasta, hriak rimtui ang

te kha lung no aṅanga siam bawm/bur a dah a ni (Mt. 26:7).

He bungbel tehkhin thu hi, mihring lam thuah chuan, nupui chu pasal tana siam, rinawm leh ṅangkai taka inpumpek tur, pasal tana nun pum pui hlan vek tur a nihna ang hi a ni a. Pathian lamah chuan, bungbel chu ringtuah chanin, Lalpa'n a Chanchin Ṭha leh a ropuina puan chhuahna atana a hmanraw thlan bik a nihna hi a ni.

'Thianghlim' (Heb. Kados; Gr. Hagios) han tih hian a huam zau khawp mai a – thar, tan chhum, tihhran, serh hnan, danglam bik tihte a kaw k thei vek mai. Kan thu lak chhuah tak kan en chuan, Lalpa Kohhran (Church), in ropui takah hian, mi tinrengte (Bungbel chi hrang hrangte) kan cheng a. Chutah chuan ngaihhlut leh ngaihhlut loh turte, entwahn tlak leh entwahn tlak lem loh te, mi hlang leh hlang lo te, tisa thil leh thlarau thil pawh thliar hrang lem lova ham bawrh bawrh ṭhin te an inpawlh vek a. Chutiang karah chuan, Lalpa tana mi hman tlakte chu 'Bungbel thiaghlim' ang mai an nih

thu a sawi. Chung bungbel thiaghlim chu hetiang hian a sawi theih ang:

**Lalpa tana mi hlang, inserh  
hrangte hi bungbel  
thiaghlimte chu an ni**

Hmelṭhat leh ṭhat loh te, fin leh fin loh te, talent neih ṭhat leh ṭhat loh te, chak leh chak loh lam pawh a ni lo, Lalpa hman theih tura inpek hi a ni ringawt mai. Kal ṭawk ṭawkin, eng mah ti thei lo pawhin awm se, khawvel nen inṭhen hranga, Lalpa lama ṅang ringawt mai te hi Lalpa tana mi fir, bungbel thiaghlimte chu an ni. Khawvel thil leh van lam thilte chawhfin bawrh bawrh mai, chawm baw k, hawp baw k kan tihte hi Lalpa hman tlak an ni thei lo. Khawvel kheng beta, "Nun hi Krista a ni," ti tlat, Lalpa tana inthawina nunga inhlantlap maite hi Lalpa mi hriat, Lalpa ta, bungbel thiaghlimte chu an ni.

**Zirtirna dik vuan tlattute  
hi bungbel thiaghlimte  
chu an ni**

Humenaia leh Philetate chungchang sawiin, "Thawhleha chu tunah pawh a ni tawh daih," an ti.

Bible zirtirna kawngpui dik leh ṭha (Biblically sound doctrine) kal kawisana, rinnaa mi dang hruai kawi/bo ṭhinte hi Pathian lungphum ngheta ding lo, ruahtui pai lo chhum ang chauh an ni. Lalpa bungbel thianghlimte erawh chuan zirtirna dik an zawm a, Bible ngei pawh hi rinna leh thiltih tehna dik lo thei lovah an pawm tlat ṭhin.

Bible zirtirna hlam-chhiaha, inlarna daw-ha leh hnaivai te tea zawl puan – ramthar bawh leh mumang um puitlin tumna hi hruai bona thlarau, tisa zia a ni. Zirtirna dik lo laka inthiar-fihlim ṭhin mite hi Lalpa bungbel thianghlim, ngaihhlut tur dik takte chu an ni zawk.

### **Bungbel thianghlim chu chhung lam leh pawn lama thianghlimte hi an ni**

Ringtute/Pathian mite chu thianghlim tura koh kan ni. Mihringin Pathian zia a kai tam poh leh a thianghlim ṭhin. Chu thianghlimna chu chhungril lama inṭanin, chu chhungril lama takna, thianghlimna leh ṭhatna chuan pawn lamah Krista

nungchang ang mihringah a tar lang mai ṭhin. Gnostic zirtirna meichher la keng, “Taksa thiltih hian thlarau lam nun a khawih buai pha lo,” tih te leh, “Keimahni duhthlan lam a ni lo,” tia, chhung lam leh pawn lama ringtu invawna leh inkaih-hruaina ngainepa, nun pawlawh leh zahpuiawm taka khawsak/nun te hi chanchin ṭha parfung chawichu a ni lo. Lalpa ngaihah leh mi zawng zawng ngaiha thil mawi hi ngaihtuah tur a ni zawk (Rom 12:17; Phil. 1:27b).

Bungbel thianghlim chu a man a to leh tlawm lam a ni lo; a thianghlim em avangin a zahawm a, a mawiin a ropui mai a ni. A neitu tan a chhuanawmin a hlu em em reng. Chutiang bawkin keini ringtute hi Lalpa bungbel thianghlimte chu kan ni a. Khawvel suauna bawlhhlawh leh zirtirna hrang hrang karah Lalpa tan invawng thianghlim tlat ila, Lalpa choka khawvelah hian, a duh duha a hman theih tur bungbel thianghlim niin rinawm leh fel takin dam chhung hian a rawng i bawzel ang u.



A nu leh pate hna thawka an buai avanga an enkawl mumal loh tuarin, drug leh dan bawhchhiat avangin jail bang a zut hma hle. Kum 16 mi lek a nih laia Vietnamese pahnih thi-



chhawnga a sawisak avangin, thubuai awrhin kum hnih tang tura hrem a ni a. Ni 45 lek hnuah chhuah zalen ni mah se actor lar tak mai, unau piang hmun pakua zinga a tlum ber, Mark Wahlberg chuan dam chhunga ser reh thei lo tur chu a lo nei ta.

“Kha tan in kawngkhar inkhar ri ka hriat atang khan, bul ka tan dawn chiah tih ka hria – sual kawng thuk zawk zawh tan emaw, nun thara nung tura bul tan emaw,” tiin Wahlberg chuan a sawi a. Pathian auvin, Catholic puithiam puihna nen, nunna kawng zawh turin a rilru a

siam fel ta zawk a ni.

Music khawvelah hian Mark Wahlberg hian hming a chher hma hle a. Kum 13 mi lek a nih laiin a hun laia boy-band lar tak ‘New Kids on the **Block**’ *founding member* ni pha ngat a ni (Thla tlem te ral hnuah a bansan mai pawh a).



Hip Hop album siam thei khawpin “Marky Mark and the Funky Bunch” group-ah a *frontman* a ni leh a. Film lamah Daddy’s Home, Planet of the Apes, Boogie Nights, Transformers Age of Extinction tihte chu a langsar zual a ni a, The Departed-a a channa ah pheih chuan Academy Awards for Best Supporting Actor a la hial a ni. Heti taka hlawhtling hi ni mah se, Lal Isua hnung a zuina kawng erawh chu ni tina inhlan tharna niin, a nun chawhmalam chhuanawm loh tak kara a duhthlanna chu Lal Isua a hmuh theihna kailawn pawimawh tak a nihzia a Chiang hle a ni.

“Rinna hian dawh theihna, hlimna leh rilru fim taka awm dan min thiamtir a ni,” tiin Walter Scott-a’n a interview tumin a sawi chhuak nghe nghe a. “Ṭawngṭaiin ka ni ka hmang ṭan a, tawngṭai vekin ka tawp leh ṭhin. Chu chuan keimahah lawmna, thuhnuairawlhna, nun dik nei tura tuihalna leh tumruhna min pe a ni. Ka nuna thil ṭha thleng zawng zawng hi ka ṭawngṭaina rah a ni. Zingah ka ṭawngṭai ṭhata, ka thil tih tuma ka chian hi chuan thil

ṭha ka ti tih ka hre thei mai ṭhin a, kha minute sawm khan nilengin min kaihruai a ni,” tiin a sawi hial a ni. Wahlberg hi ni tin minute 15-20 biak inah kalin a ṭawngṭai ṭhin a, zing tin rilru ṭha leh fim a put phah thu a sawi bawk. “Chuvangin, ni tin ṭhingṭhia ka ṭawngṭaia Pathian thu ka chhiar hnu hi chuan khawvel hmachhawn tur hian ka *confi* sawt zel,” tiin a hun hman dan a sawi a.

A kawng zawh erawh a bumboh ve hle. A ṭhian sual kawm ṭhinte laka inthiar-fihlima, mal tlat nun neih erawh harsa a tiin a ṭhiantepawhin an dem a, phatsantu angin an ngai hial ṭhin. Mahse, hneh tumin, a rilru a lo siam fel tawhna chuan chhelna a pe a. Kohhran bela Pathian mite nena awm chu a thlang thei ta a ni. A nupui Rhea Durham leh a fate pali nen, Pathianni an hman dan pawh biak in leh a chhehvelah a tam zawk ṭhin. “Naupangte’n thu an awih chuan zing dar 6:30-ah doughnuts ka siamsak a. *‘Inu hi tui takin lo muttir rawh u,’* tiin ka thlah a, dar 7:30-ah biak inah ka kal leh phawt a, banah tukṭhuan tui takin ka siamsak hnuah dar 10:30-ah inkhawm

turin kan kal leh thei thin. Ka fate zingah infiamna tur nei an awm chuan chhungkuain kan en ho leh mai a," tiin Paradein an kawm tumin a sawi. Kum 2010-a The Catholic Herald chanchinbuin an kawm tum pawhin, Pathiana a rinna tlakhniam lai apiangin hun harsa a tawng thin a, a en hun lai ber erawh a rinna tihngheha a awm apiangin a nih thu a sawi. "Ka nunah hian Pathian ka rinna hi ka dah pawimawh ber a, thup bo chi-ah ka ngai lo va, mi dang tih luh pawh ka tum chuang lo," tiin a sawi bawk.

Thalai khawsak harsa zawkte tanpui nan Wahlberg chuan a unaupa Jim-a nen, The Mark Wahlberg Youth Foundation chu kum 2001

khan an din a. Thalai tam tak, retheihna leh harsatna tawkten an tum an hlen chhuah theih nan an pui thin a, a theihna mual apiangah mi dangte tana malsawmna nih a tum tlat thin.

"Ka thiltihna reng rengah hian ka hlawhtling emaw, hlawhchham emaw, ka theihtawp ka chhuah lo nia ka inhriat hian hrehawm ka ti thin. Taimakna leh Pathian tihna nen chuan eng mah hi tih theih loh a awm lo. Tuna ka dinhmun thleng lo hian kawng danga pen bona tur tam tak ka nei. Pathian hi chu a va han tha tak em!" tiin actor hmingthang, Mark Wahlberg chuan a rinna a au chhuahpui a ni.

### D.Th. ZIR THEIHANI

Presbyterian Bible School, Mission Vengah C.Th. zir tur lak a ni leh dawn a, a dil duh chuan hengte hi hriat ni se:

1. Admission form hi office-ah Rs. 10/-in lei tur a ni. August 20, 2019 tlai dar 3 thleng dilna theh luh theih a ni ang. Diltu chu Pawl 7 pass, kum 16 aia naupang lo, kohhran dan chhunga awm a ni tur a ni.
2. August 28, 2019 chawhma dar 10-ah interview tur a ni. September 9, 2019-ah class tan a ni ang.
3. Zir hun chhung hi September–December 2019 a ni a. Hre chiang duh tan phone no. 2317343/2325082/9436198231-ahte zawh fiah theih a ni. Hostel a awm lo.

## HRUAITUTE CHANCHIN

*Lalrinchhana Ralte*  
Committee Member

Lalrinchhana Ralte hi January 1, 1982 khan Lalthangliana leh H. Lalthanhang-te fa pali zinga a naupang ber dawttu ni turin Aizawl Civil Hospital-ah a lo piang a. U mipa pahnih leh nau hmeichhia pakhat a nei a ni.

Kum 2013 khan Mary Lalziki nen inneiin, fa hmeichhia pahnih leh fapa pakhat an nei a, tunah hian Mission Veng, Aizawlah an khawsa mek.

Zirna lamah hian B.Tech. (Civil) niin, tunah hian Aizawl Municipal Corporation-ah a thawk mek. Infiamna lam a ngaina hle a, a ngainat ang hu erawh chuan thiam em em a nei hran lo. A en lamah a ramtang ta deuh ber.

KTP-ah bial leh branch-ah chanvo hrang hrang a chelh ve tawh a, branch-ah Treasurer ni mekin, bialah Ex-officio-in a awm thung. Kohhranah Electric Committee Secretary leh Building Committee Secretary chanvo a chelh tawh a, Sande Sikulah Senior Department zirtirtu ni mekin, naupang chawhnu inkhawmah committee member a ni tawh bawk. Kum 2018



khan CKTP committee-ah thlan niin Kristian Thalai chanchinbu Manager a ni mek a, kum 2019-2021 chhung atan Prebyterian Youth Fellowship (PYF) Assistant Secretary atan thlan a ni bawk.

*"I awm dan tur chu Lalpa chungah nghtat la, Aman chu ring la, Aman a ti vek ang"* tih hi a nun innghahna zinga mi a ni a, *"Khawongaihna mak marwi leh duhawm"* tih hla hmang hian a intichak thar leh thin a ni.



**K**ṚP member ni ta ila, kum 40 kan nih chuan kan hun a tawp dawn tihna a ni a. La KṚP chak viau mah ila, kan kumin a phal thei tawh lo. Kum 26 chhung chauh KṚP a nih theih a nih chu. Paula'n, "*Keia tan zawng nun hi krista a ni si a,*" (Phil. 1:2) a lo ti ve bawok a. Kan *thatlai nun rei lo te hi 'ka nun hi KṚP a ni si a,*" kan tih ve hi a lo *tha mang e.* Nulat/Tlangval kan hriat tih atanga KṚP kan nih loh chuan soal kawng zawh te hi a awl em em *thin.* Rawngbawlna hrang hrangah inhman ve chak mah ila, kan la naupang deuh si a; nu leh pa zingah han tal ve deuh ila, a hrehawm deuh bawok si a. KṚP-ah telin, rualpuite nen thawh ho a lo nuam ber a; chuvangin, kan *thatlai nun hi 'Nun KṚP'* ni tawp mai se a va hlu dawn em!

Kum a lo tama, kan tih ve tura kan lo ngaih hauh loh rawngbawlna te, Pathian leh kohhran duhsaknain kan han chang ve a. Kan lo Nun KṚP loh *thin* avangin, kan bangbo duh khawp mai. "*Aw, ka KṚP hun lai khan lo inhman deuhvoin, lo ngaihsak ve deuh ila aw!*" kan ti fo mai dawn a ni. Pa pakhat chuan, "*Ka tlangval ve laiin, kan khuua KṚP hruaitute kha tute nge an nih ka hre miah lo,*" a ti a, a inchhir leh hle a ni. Rawngbawlna hrang hranga zai ho leh hla zirnaah pawh, KṚP ngai lo chuan *tonic solfa* pawh an

thiam lo tlangpui. *Thiante'n* duh leh an *bass a,* an *tenor* laiin, an lo *air (soprano)* ve luah luah mai chu zahthlak duh deuh a ni. Nun KṚP la, heng zahna tam tak hi i pumpelhe thei dawn a ni.

Miin an thusawinaah *Bible* chhiar tur an han sawi a, zawng hmu ve hman mang lo te hi an KṚP ngai loh leh *Bible* an chhiar tam loh vang a ni fo. KṚP chuan *Bible* an chhiar tam a, *thenkhat* phei chuan an ziak chhuak hial a ni. *Bible* i chhiar tam ang u.

*Sadhu Sundar Singh*-a chuan, "Ka nun hi *ṭawngtai nun a ni*," a ti a. Keini pawhin, "Ka nun hi KṚP a ni," ti ngam khawpin kan *ṭhat lai hun hi i hmang ang u*.

Kristian Hla Bu *solfa* awm chhut hmasak ber, hla 461 awmna bu kha, sak thiam loh nei lovin hla *number* zawng zawng ka lo hre vek te kha, kan phak tawka kan lo KṚP em vang a lo ni.

KṚP General Conference 1957 em maw nia Dawrpui Biak Ina hla sak inkhawmah, Rev. P.D. Sena hova 'Hmuh ngai loh Pathian, ka ngai che' tih te, Rev. Luka Hnamte hova 'Vantlang leh i felna lakan' tih duh em ema kan sak te kha, a hmanlai tawh hle na a, rilru leh chakna zawng zawnga KṚP-a kan lo tel vena a ni a. Tun hnuah chuan a lo hlu hle mai.

KṚP thupui 'Rawngbawltura chhandam' tih thupui neiin rawngbawlina kan han thawk ve te hi a va ropui em! Chutiang ti thei turin Pathianin a Fapa thisen sengin min han chhandam mai hi a va mak em!

Kohhranho leh KṚP zingah kan han tel ve ngawt te hi a ropui hle a ni. Mi sual pawh hnar ngai lo, mi sual *ṭawngtai* pawh chhang duh zel Pathian

kan nei hi kan va vannei em! Kan *ṭhatlai* hun tlem teah hian rawngbawl hna thawkin i *ṭang ang u*. KṚP inkhawm te, kohhran inkhawm hrang hranga kan tel ve zel te hi, rawngbawl hna thawk kan ni. KṚP chanchinbua Bial leh *Branch* rawngbawlina chanchin te hian min va fuih nasa em! *Sermon* te, Ngaihnaawm ngaihawm te, *Work camp* leh *report* hrang hrangte hi **Nun KṚP** atana fuihna *ṭangkai a tling a ni*.

Kohhran inkhawm hrang hranga KṚP *member*-te inkhawm zat chhiar te hi min fuihtu atan a va *ṭha* em! KṚP tawh lo tan pawh chhiar a nuam *ṭhin*. Kan kohhrana Pu R. Lalthanbiaka chu kum 2018 chhung kohhran inkhawm zawng zawng, zing *ṭawngtai* inkhawm nen lam a kal kim vek thei a, entawn tlak tak a ni. A nun a Kristian a, a kohhran a, a inpe a ni. Keini KṚP-te hi kan nun a KṚP em?

Paula chu a chet velna apianga Krista a tel ve zel avangin, a nun chu 'Nun Krista' tia a sawi ang hian, nun KṚP-a kan nun chuan Lalpa tan kan nung a, kan thih pawhin Lalpa tan kan thi (Rom 14:8) kan ti ve tur a ni ang.



*"Lehlama tangte zinga miin kan chungh thu tha lo reng sawi tur an neih loh avanga an zah theih nan, engkimah thil tha tih kawngah tihmuhtuah intilang la, i zirtirnaah chuan i takzia te, i zahawmziate i thu sawi dikzia sawisel rual loh te chu tilang rawh." Tita 2:7,8*

Career awareness han tih hian a tawi zawng chuan kan hma lam hun atana zir tur te, hnathawh tur te, eizawna tur te leh hmasawna tur inkawhmuahna tih te pawhin a sawi theih ang a. Tunah chuan KTP te kan kawh avangin zirna leh chu lam atana inbuatsaihna lam kan hrut dawn a ni.

### **Eng nge nih i tum?**

Kan naupan lain kan zirtirtuten, "Eng nge nih i tum?" tiin min zawt thin. Kan chhanna tam tak chu – IAS, IFS, Pastor, MCS, Doctor, Officer tihte kha a ni thin. Tam tak chuan thiante tih ang apiang kha kan ti ve mai a. Thenkhat erawh chuan an nih tum tak tak kha an lo Chiang daih tawh a lo ni a.

Tleirawl pakhat chuan, "Kei chu sipai tawtawrawt ham chi (band party) nih ka tum," a ti thin a. An nuh dar dar thin a, tun hnuah hian a duh tak chu a ni thei ta tak tak a. A nuh zat thin tam takte kha lak tlak vak lohvin an chhuak ta zawk hlauh va! Naupang nih lai atang hian kan nih tum kan chian chuan thui tak min lo kaihruai thei tih a Chiang hle.

### **I nih tum kha a dik em?**

Thiante tih ang apiang ti ve mai mai hi team khat daih kan awm ve hrim hrim. Mahnia thutlukna siam thiam lo, mi dang tih apiang ti ve mai mai thin hi kan tam. Chutianga ti ve mai thinte pawh chuan an tum tlat chuan an hlawhtling ve leh

mai ðhin tho bawk a. A pawimawh ber chu – kan nih tum hi kan tum tak tak em tih hi a ni ang.

Thenkhat chuan, “America President nih ka tum,” tih te fiamthu thawh nan an hmang ðhin. Zoram khawvel atang chuan America President nih chu kan hlat deuh. Kan nih tum kan chian a ngai a, chu chu nih theih a ni reng em, a tak takah tih theih a ni em tih kan ngaihtuah a tul a ni.

*Kan nih tum kan chian a ngai a, chu chu nih theih a ni reng em,*

*a tak takah tih theih a ni em, tih kan ngaihtuah a tul a ni.*

taimain kan zir nasa tur a ni a. Mi peih loh hnuah pawh kan peih fo tur a ni. Chutianga KÏP-a inhmang tak chung a mi hlawhltling sawi tur pawh an awm. An taimak vang a ni thung. Hlawhtlinna chu kan peih tawk chinah a awm reng lo; kan peih bak leh mi dangte pawhin an t a w p s a n hnuah a rah lawh tur a lo awm leh ðhin zawk. Heng – ‘tei rei peihna te’, ‘taimakna’ tih te hi KÏP nen pawh hian a inhmeh em em a ni.

### **I nih tumah i chian a ngai**

Zirlai nih lai chuan kan nih tumah kan chian a ngai. Pathian tih loh vah chuan kan zirlai kan dah pawimawh hmasa ber tur a ni a. KÏP-a kan inhmang a nih pawhin a âwm tawk kan thliar thiam a ðha. Hlawhltling tak ni tur kha KÏP chet velna (activities) avanga hlawhchham kan nih vaih chuan mi dangten KÏP chu inhmanna tlak lovah an ngai mai ang.

KÏP-a kan inhmang a nih pawhin mi aiin kan zir

### **Engtin nge ka inbuatsaih ang?**

Sawrkar hna chauh hi kan rilruah a awm tur a ni lo. Private company te, ram pawn (foreign) leh thil hrang hranga hman tlak ni turin kan inzir thiam a tul hle a. Chutianga hunah chuan kan hnathawhte chu chanchin ðha hrilna atan pawh a la tangkai ang. Theology zir turin eng nge tih ngai? Medical line-a kal turin eng nge tih tur? Engineer lam atan engtia inbuatsaih tur nge?

Lehkhahu hrang hrang chhiar ila, hawi zau ila. Eng hi nge ka tan tha, eng hi nge kan sum leh pai dinhmun nen inrem, ka zir duh hi khawi university-ah nge tha, zir dawn ila senso te, awmna tur te a awm em, Pawl 10 pass hnuah eng sikul hi nge tha, khawiah nge ram puma mi thiam leh zirtirtute an awm, ka nih tum ang hi ni dawn ila Pawl 11-ah eng subject nge ka lak ang, pawl 12 ka zawh hunah engtin, college hi khawi hi nge tha an tih, master degree lak nan eng university nge tha, tihte ngaihtuah a tha.

### **Pathian rawngbawlna atan lehkha thiam a pawimawh**

Pathian hian mi tling lo leh lehkhathiam lote a hmang thin ti bawk thin mah ila, lehkhathiam a hman tangaite hlei hlei hian an thawh hlawkin mawhphurhna an nei sang em maw tih tur a ni a. Lehkha zir san hi a hlu a. Thiam tak tak tur pawhin kan zir tur a ni bawk.

Degree chauh sang ve ur, hman tlak tak tak chuang si loh a awm ve theih. Miin an ngaihsan vak loh degree


neih pawh thil awm thei a ni. Kan degree mil thiamna hi kan paw chhuak em, chutiang tak chuan miin min ngai em, keimah hian ka inhai veng zo em, tih ngaihtuah fo a pawimawh hle.

### **I nih tum chu i ni thei alawm**

I chawr chhuahna chhungkua emaw, i sikul kaina chu eng pawh lo ni se, nangmah kha i pawimawh ber. Abraham Lincoln-a kha ngaihtuah la, wawi tam tak a hlawhchham asin. Sikul tha chhuak i ni lo mai thei. Mi hlawhtling tam berte hi zawt teh mah, sikul tha chhuak an ni vek chuang lo vang. A tam berte hi hlawhchham ve tawh an ni ang; beidawnnain a hmeh khawng ve theih loh avanga hlawhtling erawh an ni.

Eng pawh ti dawn ila, Pathian ta kan ni a. Pathian ropuina tura kan inhlan leh kan zir phawt chuan chung lam khian kan mamawh chu min pe em em ang tih hi rin tlat tur. Kan hlawhtlinnate hian Pathian min hnaitir sauh ang nge kan hlat phah sawt ang tih erawh ngaihtuah nawn fo a tha.





**K**um 1955 kum bula lamah Phulmawi khuaa ka pa u fate 2 chu Champhaia lehkha zir turin an lo kal a. Kan inahrawn riakin, kal ve ka duh leh duh loh min zawt a. Kei chuan, “Kal ve ka duh,” ka ti a. Ka nuten min chawm thei dawn nge dawn lo tih pawh ka ngaihtuah lem lo va. Fapa mal ka ni a, ka pain kum 4 ka nihin min thihsan a, ka nu hovin ka u hmeichhe 3-te nen kan hmeithai a.

Champhai chu khawiah nge a awma, engtia hla nge a nih pawh ka hre lo. Ke hlira ni thum kal a lo ni a! Ka ni chuan kal chu a remti vak lo va; mahse, min hnial lem lo va. “Kumin chu kum rei tur a nih hi,” a ti mai a, kum khat lai ka’n thang bo tur chu a ngai ngam lo hle a ni. Zingah chuan ka thuamhnaw neih ang ang leh ka puanthuah chu thul teah ka rem a. Ka ute hnung zui chuan kein ka inphur ve ta a. Ka nu ngaih ngam lo chuan emping ruak khaiin minrawn um a, min um pha thuai a, ka phur chu kan insem ta a. Raldanah chaw kan fak a, Lungphovah kan riak a. Lungpho atangin Chalrangah kan riak leh a. Chalrang atang chuan Champhai Chawnchhim chu kan

ban ta a. *Gandhi Memorial H/S*-ah chuan kan lut ve ta a. Ka u chuan pawl 9 a zir a, keiin pawl 8. *Hostel*-ah kan awm a. Sikul kan luh fel hnu chuan ka nu te chuan min hawsan ta a. Ka lung a leng hle mai. Sikul fee chu thla tin cheng 5 a ni a, kei chu hmeithai fa ka nih avangin a chanve min awl a.

Kan chhungkaw ei-zawna chu thingtlang lo neih hi a ni mai a, ka nu hovin ka uten lo an nei kum tin a. Pathianin mal a sawm a, buh ei kan nghei ngai lo. Bawngpui sawr lai pakhat kan nei a, a hnute pava khat pawisa 12 (dere)-in kan hralh thin a. Chu chu kan pawisa lak luh vena awm chhun a ni. A changa buhfai hralh zeuh zeuh te nen.

*Hostel*-a awmten thing tuah tur kan inphurh chhawk a, tui kan inchawi chhawk a, chaw kan inchhum chhawk thin. Sikul pawh rap in a ni a. Zirtawp chawhnu apiangin a hmun la laih zawh loh kan lai thin. 2nd term luh chuan *hostel*-a awm chu tha zel dawnin kan hre lo va. Lehkha zir a harsa a. Kahrawt Biak In kawmchara di in thar, te deuh chu pathumin thla tin Rs. 5 chawiin kan luah ta a. Thawhtan zan apiangin inkhawm a awm thin a. Eng inkhawm nge a nih pawh hre lovin kan inkhawm ve mai thin. KṚP inkhawm a lo ni a. Anni zawng an lo ding hma a, kan zirtirtute pawh hruaitu an lo ni hlawm a, nuam pawh kan ti khawp mai. "Chhing-chhipa ka haw hunah ka din ve ngei ang," ka ti rilru a. Hemi kum hian tha takin pawl 8 chu ka pass ve a ni.

Heng hun lai hian Champhaiah chuan ei leh bar a la tlawm hle a. Ralleng buhfai ser 4 cheng 1, leilet buh ser 3 cheng 1 a ni. Anhnah tel khat dere, chengkawl bial no hum khat dere, faibar hlawm khat dere a ni. Thingpui dawr pakhat a awm a, a lun lem lo. Mipa puitling ni khat hlawh chu

2.30 a ni a. Keini pawh bang dap tah te, thing ek te'n kan inhlawh thin a. Mau a vang a, mel 6-a hlaa mau an pu thin.

Kum 1956 a lo thlen chuan zirna chhunzawm ngaihna ka hre lo. Kan khua leh a chhehvelah *high school* a awm lo va. Aizawl emaw, hmun dang emaw pan turin chawmtu ka nei bawk si lo va. Vanneihthlak deuh ma'in kan khaw P/S zirtirtu Pu C. Lalrampana chu a *training* dawn hlahu mai a, V/C te leh Kohhran *Committee*-in a ai lo awha thla tin Rs. 5/- leh buhhum thin 36 hlawh turin min la hlahu mai a, kan lawm teh asin. Keimahin ka thawk ta a, heta ka sikul naupang hmasate chu a then *politician*, a then *officer*, a then zirtirtu leh Kohhran Upa te an awm ve a, eng emaw zat an la dam a, an hmel hmuh a nuam thin ngawt mai.

KṚP din dan tur chu thiante nen kan sawi ho thin a. A tawpah chuan, Aizawla kan hotute hnenah inkaih-hruaina dan bu chah ni sela kan ti a. Hetih laia Secretary NI. Saptawni hnenah kan zuk chah a, minrawn pe ta a. Tv. B. Malsawma (Upa B. Malsawma, Bethlehem) nen

kohhrana KTP din dilna chu kan theh lut ta a. Kohhran Committee chuan kan duh dan te min zawt a, ka thiam ang anga kan chhan hnuah, "Pawnah lo va nghak ula, kan han ngaihtuah ang e," an ti a, KTP din chu min phalsak ta a. September ni 10, 1956-ah Kohhran Committee-in inthlan min neihpui ta a ni.

KTP lo ding ta chu hre thiam lo an awm nual a, thlarau talhtum, kohhran dodalna tura ngai te pawh an awm nual mai. Mahse, hengte hi a tum a ni lo. Theih ang angin kohhran rawngbawlina leh a than zel dan tur kan ngaihtuah nasa ve em em a. Kan zingah lehkhathiam kan awm lo. Kan leader a thiam ber lahin a thawhna hi Roman Catholic School a nih avangin Catholic lamah min pakaisan a. Tv. Romawia hovin theih-tawp kan chhuah zel a, kar tin Thawhtan zan apiangin kan inkhawm a, thu te kan insawi chhawk ve thin. Kan hmalakna hmasa thenkhat: chung inkhawm nei thei lo neihpui, khawhar inah tanngtaipuina neih, sum tuak nan lo neih, kawng laih, thing zaia inhlawh, mike Ahuja lei, biak ina hman tur sana lian (Pendulum), Calcutta-a mi kan

chah, dar phek lian tak kan lei Krismas-ah carol kan nei thin, hla key zawwna (pitch pipe) kan lei, kan pulpit hman lai chu far thing eh phel, suih mama mistiri hmasate'n an siam a ni a, a that tawh loh avangin Ngiau thinga siam turin thingzai thiam tha takin kan zaitir a. Baktawng khaw mistiri thiam Pu Thanhranga te pafain (inlarna hmuh angin) nalh takin an siam a, an siam chhungin kohhran in tinin chaw kan ei lawrpui a, Rs. 200-in an siam a. A lawm nan sechal talhin kohhranin ruai kan theh nghe nghe a ni.

Kum 1968-ah Chhing-chhip chu Pastor thuthmun kan lo ni ve ta a. Bial KTP pawh din nghal a ni a, O.B. hmasa ber Asst. Leader-ah ka awm ve a, a hnu lamah Bial Leader-ah, Presbytery huapah Asst. Leader hmasa ber ka ni ve leh a; amaherawhchu, a ding zel ta lo a ni.

KTP-a an vanglai hmangete chu nu leh pa an nih pawhin an ngaihtuahawm loh. Eng rawngbawlina pawh chelh se an ze a, an tlin a, khawtlang thiltihnaah pawh an tangkai thin. Kohhran belh nachang hre lo, KTP-a inhmang ngai lo chu an ze lo hle thin.

Pathian thu zir duh mi thiam tak tak lak sen loh leh *Pro. Pastor/Pastor* rawih sen loh kan nei ta te hi KṯP leh Thlarau Thianghlim hna-thawh ni ngeiin kei chuan ka hria.


KṯP *General Conference*-a ṯhalai rual, a sing tel tehmeuh mai Pathian faka an pung khawm hmuh te hi a va nuam em! Kei ngei pawh Vairengte, Champhai, Serchhip leh Lungdarahte khan ka tel ve asin. ṯhalai zuk leh hmuam ti lo, kuhva ei lo tih hriat tak mai, ha fai var ṯhah mai hmuh te hi a va nuam em! *Conference* apiangin hla ṯha tak tak a chhuak zel a, hla phuah thiamte u, chawl mawlh suh u. Zaithiam an lo chhuak zel te hi KṯP-in a hrin chhuah a ni. Zaithiamte u, inren suh u, in zai theih loh hun te a lo la thleng dawn asin.

Kei thingtlang pa mawl mai pawh hi kum 18 chauh ka nih atangin KṯP-ah Pathianin min lo *training*-tir a, kum 21 ka nihin kohhran *committee*-ah min thlang a, *Secretary* ka ni nghal a ni. Kum 35 ka nihin Upaah min thlang a, bialah, *Presbytery*-ah leh *Synod* thlengin chanvo pawimawh tak tak min chelhtir ve a ni.

Heng mawhphurhna pawimawh tak tak ka chelh chhan hi KṯP vang ka ti lo thei lo. Tunah kum 81-na ka hmang ve mek a, zu far khat mah ka la tem lo te hi ka va lawm em!

KṯP-in a hrin chhuah pawimawh em em chu kohhrana Pavalai Pawl lo ding hi a ni. ṯhalai tana tih harsa, upa chak lote tana tih hleih theih si loh, pavalai rualin hma an han lak hi chuan kawng hi a kaw duak duak mai a ni. KṯP *General Conference* neih loh kuma *Presbytery* huap KṯP *Conference* neih ni sela tia an *pass* khan Chhingchhip Venghlun Kohhran chu a hmasa ber atan a thlengtutur kan ni a. Kum 2009 (Mautam kum) a ni a, a huphurhawm hle na a, Pavalai Pawl a lo ding hman hlauh mai a, Pavalai kutah kohhranin a dah a, phur em emin *pandal* mawi leh zau tak an han sa ta mai chu a lawmawm asin. Kan *Presbytery* huam chhung KṯP *Branch* an lo tel kim a. Kohhran te deuh pawhin zaipawl an rawn nei thei a, *General Conference*-a vawi khat mah zai lo turte an han zai chu a lawmawm danglam khawp mai.

KṯP, ṯhang zel la; Pavalai Pawlte u, ṯhang zel rawh u!



# KANTU

## JUBILI Branch

*K*ristian Thalai Pawl, Jubili Branch hi kum 1991-ah din a ni a. Mission Vengthlang Bial chhunga branch pathum zinga pakhat a ni. Kum 2019 June thla thleng inchhiarnaah hian member 327, mipa 181 leh hmeichhia 146 an ni.

Tunah hian Branch Committee Member 25 (OB 6, Ex-Officio 2) an awm mek a. Branch Committee thut khawm hun nghet hi Bial KTP-in a lo rel angin thla tin Thawhlehi vawi hnihnaah neih thin a ni. Kum tawpah kum thar thlir lawk committee a thu thin a. Kum tirah Kum Thar Committee thuin kum tuana kalphung tur te rel thin a ni. Branch KTP inkaihruaia bu booklet siam a ni a. Branch Committee Member-ten an kawl vek a ni.

Kumin chhung atan an branch budget chu '5,50,000 a ni. Sum tuak dan tlangpuite chu: Thla tin thawhlawm ip, Blanket suk, KTP Show, Balu thiar, Sangha zawrh, Pickle

zawrh, Bookmark siam, Family Calendar siam, etc. a ni a. Group pathum siam a ni a. Kohhran Upa, chatuan ram pan tate hming chawiin – Upa Zalianthanga Group, Upa Lalbiaksanga Group leh Upa D. Vanlallawma Group-te a ni. Group hi committee meeting hun nghet siam a ni a, Zirtawp zan hnukung ber dawttuah thut khawm thin a ni. Group hming hi kum thum danah thlak thin a ni.

Group-te hi inelna hrang hrangah kumtluanin an inel thin a. Thawhtan zan inkhawm inchhiarnaah te, Inrinni zan leh Pathianni chawhnu inkhawm kawp te, Thla tin thawhlawm ip lut tha te leh Sports item

hrang hrang hmanga in el  
thin a ni.

Kumin chung hian  
Branch Project hran nei lem  
lovin, "Kohhrana a tam thei  
ang ber sum chhun luh" an  
tum a. Kumin vek hian KṬP  
Show neih an tum bakah,  
kum tawp lamah hian Aizawl  
khaw pawn branch-te zan riak  
ngeia flawh an tum a ni.

Branch Inkhawm hi  
Thusawi, Rilru sawi, Thupui  
zir, Inkhawm tam zan,  
Teenage Night, Missionary  
Night, Literature Night-tea  
hun hman thin a ni. Kohhran  
chungkuaa chhiat tawkten  
KṬP-te zai turin an sawm thin  
a, zaipui thin an ni. Krismas  
pualin luan chhuah thin a ni  
a. Veng chhunga kum upate  
thilpek hlan bakah veng  
chhunga damlo/mi harsate  
leh damdawi in lamah te  
thilpek pek thin a ni.

Kum 2019 chung hian  
sub-committee hrang hrang  
sawm – Zaipawl, Library,  
Ushering, Decoration,  
Finance (Thawhlawm Ip),  
Sports, Music, Ei leh in  
bakah chanchinbu 'Jubili'  
Editorial Board te,  
Evangelism Cell te din a ni.

Heng bakah hian May thla  
aṭangin Variety Show Sub-  
Committee din a ni bawk.  
Kohhran Zaipawl te hian  
Pathianni zan inkhawm  
banah hla zir thin a ni.  
Evangelism Cell hian thla tin  
Thawhṭanni hmasa berah  
chaw ngeia ṭawngṭai hun an  
hmag thin. KṬP Library hi  
kum 1994 August 22-ah din a  
ni a. Thawhṭanni zan in-  
khawm banah member-te tan  
hawn thin a ni. Kumin hian  
Library Silver Jubilee lawm  
turin an inbuatsaih mek a ni.

Central KṬP aṭanga tih  
tur lo kalte tih ve zel theih a  
ni a. Kristian Ṭhalai Golden  
Jubilee Quiz-ah pawh tel ngei  
tumin an inbuatsaih mek a ni.  
Biak in hawnga nupui neite  
thuziak leh sum in lawmpuina  
hlan thin an ni.

Kumin chung hian  
Kristian Ṭhalai copy 80 an la  
mek bawk.

*Vanrama kan awm dan tur  
kan insawi nawmsiak mek  
lai hian, kal tura inpeih  
erawh kan tlem viau si ang  
em?*



## HRINGLANG TLÁNG

---



---

### LEI DAWHTU

**T**um khat chu lo neitu unau pahnih, inthenawm chiaha khawsate inkarah hian buaina lian tak mai hi a chhuak a. An huan zau takah chuan kum 40 chuang inngeih takin khawl thil leh mamawh engkim inban tawnin an lo inthenawm tawh a. Ni khat chu thil ho teah ngaih dan inan loh vangin an inhnial chiam a, kar tluanin an han inbe duh lo zui ta bawk a.

Tukkhat chu a upa zawk John-a te kawngka chu tu emaw ni hian a rawn kik dat dat a. A va hawn chuan mi pakhat hi mistiri bungrua nen a lo ding bawr tuai mai a. “Hna thawh tur zawngin ka lo kal a,” a ti a.

“Hetah emaw, khawi hmunah emaw hna in neih phawt chuan, ka thawk thei vek a nia,” a ti a.

“Nei teh reng mai,” unau a upa zawk chuan a ti a. “I hna tur chu maw, lo kal mah teh, sawti lai, kawr insial ruah piaha in ding saw i hmu em? Kan thenawm, aa.....a nihna takah chuan ka nau a nia. A hma chuan kan inkarah

hian phul nuam tak a awm thin a, ti hian a bulldozer-in a rawn lai ta vak a nih hi. A tha alawm, inlak hran a duh phawt chuan ani aiin ka inla hrang thei zawk tih hi hre teh se. Saw lai chhek in thingzai saw i hmu em? Pal sang tawh min siam la ka duh a ni. Sawng ramte saw ka hmu peih hrep lo ve,” a ti ta tawn tawn a.

Mistiri chuan, “Ka hre thiam e. Ban phunna lai tur te hi?” a ti a. Lo neitu chuan pal ban phunna turte chu hrilhin, mamawhte chu a lak khawmpui zung zung a. Tichuan, mamawh dang lam turin dawrpui lamah a kal ta a.

Mistiri pawh chuan a thawk nghal mawlh mawlh a.

Ni tlak dawn suar suar chuan lo neitu dawrpui kal pawh a lo haw a. Mistiri hna thawh a'n hmu chu mak a ti ngei mai! A unaupa nen an inrinaah chuan pal sang tak tak reng hmuh tur a awm lo, lei (bridge) zawk a ni . An ram lam atang chuan a nau te ram lamah lei hi a lo indawh phei zai mai a, a vawnbaw pawh nalh takin a siam a.

A nau zawk pawh chuan lei lam chu a rawn pan a, a ban chu rawn phar chhuakin, "Eng ang mi nge maw i nih le? Tih dan tur zawng zawng ka hrilh hnu che pawha hetiana lei i dawh tak?" a rawn ti a.

Lei dawh thar chu a han zawh chhin a, a u pawh chuan lehlam atangin a rawn zawh baw a. Lei laiah chuan an intaw a, hlim takin an inchibai a.

Thil inkhak ri raih an hriat chuan an han en a. Mistiri chu kal mai tum hian a bungruate chu a lo ak uaih tawh a. A upa zawk chuan, "Ngawi teh, la kal teh suh. Hna dang te pawh kan la nei a nia," a ti a.


"Hna dang thawh leh chu a chakawm hle mai. Mahse, hmun dangah lei dawh leh tur ka la ngah viau mai," a ti a.

*(Remna siamtu. Matthaia...)*

### GOLDEN JUBILEE QUIZ CHUNGCHANGA HRIAT TURTE

1. Semi Final-ah branch 20-te group 4-ah inthen a ni ang a, group khatah branch panga zel awmin an intihsiak ang. Group tina titha berte leh group tina pahnihna zinga titha berte Final-ah an inel ang. Tichuan, Final-ah branch 5 an inel dawn a ni.
2. Semi Final-ah member 20 aia tam lovin a hmunah mahni branch aiawhte an jawiawm thei ang.
3. Final-ah hian member 50 aia tam lovin a hmunah mahni branch aiawhte an jawiawm thei thung ang.





### **CKTP ASSISTANT COORDINATOR THAR**

Synod Service Board-in Asst. Coordinator a lak thar zinga mi, Tv. Lalringgheta s/o Lalchhuansanga, College Veng, Aizawl chu Synod OM chuan KTP Office-a awm turin a ruat a, lawmawm kan ti hle.

### **MISSION VENG KOHHRAN HALL HMAN REMTI**

Aug. 15, 2019-a HIV/AIDS Trainers' Training buatsaih nana Mission Veng Kohhran Hall kan dilna chu remtih a ni.

### **SYNOD HOSPITAL-IN LAWM THU SAWI**

Synod Hospital Director, Dr. L.H. Thanga Singson hnen aʔangin Grace Home Cook pahnih hlawh atana kan thawh, Rs. 3,000 ve ve thin chu Rs. 4,000 ve ve kan tum tawh tur avanga lawm thu sawina kan dawng.

### **THISEN PE THA CHAWIMAWINA DAWNG**

June 14, 2019 (*World Blood Donors Day*) khan Association for Voluntary Blood Donors buatsaihin Dawrpui Multipurpose Hall-ah *World Blood Donors Day* pualin hun hman a ni a, hetah hian kum 2018-19 chhunga Mizorama pawl hrang hrang a thlawna thisen pe thate hnenah AVBD chuan chawimawina a hlan a, KTP te chu a pum puia pe tha pahnihna kan ni a, Electric Fan leh Citation kan dawng. KTP-ten kum 2018-2019 chhunga thisen kan pek hi unit 4,193 a ni. *World Blood Donors Day* lawmnaah hian Rev. Dr. K. Lallawmzuala chuan hunserh a hman a, ani hian thisen pe tha chawimawina hi KTP aiawhin a dawng nghal.

### **HURAITUTE CHHUAHNA**

### **Kawrtethawveng Bialah YRC Campaign**

May 30-31, 2019 khan Kawrtethawveng Bial KTP chuan West Bungmun

[www.mizoramynod.org](http://www.mizoramynod.org)

Kohhranah YRC Campaign-cum-Sports Meet an nei a, he hun hmanpui hian Dr. Lalrotluanga, Treasurer leh Pu P.C. Lalrinsanga-te an kal. May ni 30 (Ningani) zan khan West Bungmun Kohhran Hall-ah YRC Campaign neih a ni a, zawhna leh sawi hona hun hman a ni. May ni 31, (Zirtawpni) nilengin Bial Sports neih a ni bawk.

**Zokhawtharah Leadership Training neihpui**

May 31-June 2, 2019 chhung khan Zokhawthar Bial KṚP Leadership Training neihpuiin T.Upa Lalsiam-mawia Pachuau leh T.Upa David Lalhmachhuana-te an kal. June ni 1 nilengin Leadership Training hi neih a ni.

**Tlungvel Field Veng Branch Golden Jubilee**

June 5, 2019 khan Tlungvel Field Veng Branch KṚP Golden Jubilee hmanpuiin Upa Rosangliana, Asst. Leader leh Pu C. Malsawmtluanga, Committee Member te an kal.

**Brigade Branch-ah Biak In Serh inzirtir**

June 17, 2019 (Thawhṭanni) zan khan Brigade

Branch, Bawngkawn Bialah 'Biak In Serh' inzirtirna hun hman a ni a, T.Upa Rochungnunga, General Secretary a kal.

**Mizoram Synod Choir Report (May 28-June 17, 2019)**

Hla zir zat : Ṭum 5  
Program neih zat : Vawi 2

**Programme neihnate**

1. June 10, 2019 – Republic Vengthlang Branch KṚP – Project 300
2. June 16, 2019 – Durtlang Kohhran – Zin report Inkhawm

Heng kan programme pahnihah hian vawi 4 din chhuahah hla ṭum 8 rem a ni. ~ May 31, 2019 zanah 'Hnehna min tiamtu & Nang malsawmna ni ang che' (medley) hla chu Kings & Prophets Studio, Ramhlun North-ah audio recording neih a ni.

~ June 7, 2019 zanah 'Min rawn chhar ta' tih hla Kings & Prophets Studio Ramhlun North-ah audio recording neih a ni.

~ June 13, 2019 chawhnu dar 1-ah CKṚP hruaitute nen, A.R. Ground-ah football khelin hun hlimawm tak kan hmang.



**Kantu : Jubili Branch**

**CENTRAL K.T.P. HRUAI TUTE 2018-2020**

**Office Bearers**


|                   |                               |            |
|-------------------|-------------------------------|------------|
| Leader            | : Rev. Dr. K. Lallawmzuala    | 9402551279 |
| Asst. Leader      | : Upa Rosangliana             | 9612166769 |
| Gen. Secretary    | : T.Upa Rochungnunga          | 9862658082 |
| Asst. Secretary   | : Upa Ricky Lalrammawia Ralte | 9862387308 |
| Treasurer         | : Dr. Lalrotluanga            | 9436153937 |
| Finance Secretary | : T.Upa Lalmuanawma           | 9436196515 |

**Committee Members**

|                            |            |                           |            |
|----------------------------|------------|---------------------------|------------|
| Dr. David C. Vanlalfakawma | 9436156561 | Tv. Robert Lalduhzuala    | 9862368012 |
| Pu C. Malsawmtluanga       | 9862587200 | T.Upa Lalsiammawia Pachau | 9862742440 |
| Pu K. Lalengzama           | 7308187298 | Upa K. Lalnuntluanga      | 8974240614 |
| T.Upa David Lalhmachhuana  | 8415926838 | T.Upa R. Lalbiakmawia     | 9612762602 |
| Pu Rorelkima               | 9862266440 | Tv. Benjamin Lalnunpuia   | 9862306526 |
| Pu Lalrinchhana Ralte      | 9774365619 | Pu P.C. Lalrinsanga       | 9436144233 |
| T.Upa Malsawmtluanga       | 9612588677 | T.Upa Lalrinmawia Ralte   | 9862359884 |
| Pu Lalruatfela             | 9436705777 | Tv. K. Lalchhanhima       | 9089933771 |

**Ex-Officio Members**

|                        |                               |
|------------------------|-------------------------------|
| Rev. R. Lalhmingthanga | - Synod Moderator             |
| Rev. R. Vanlalnghaka   | - Synod Secretary (Sr.)       |
| Rev. K. Lalrinmawia    | - Executive Secretary i/c KTP |



Postal Regn. no. MZR/81/2018–2020  
RNI No. MIZMIZ/2009/29074



Printed and Published by Rochungnunga, Synod Office, Mission Veng on behalf of Kristian Thalai Fellowship  
Edited by Robert Lalduhzuala and printed at Synod Press, Mission Veng, Aizawl, Mizoram. Copies – 42,000